

Danskit ilinniarnermi siuariartornissaq pillugu nutarterinerat ilinniagaqartunut nunatsinneersunut Danmarkimi najugaqartunut danskit ilinniagaqarnermi tapiissutigisartagaannit pissarsisinnaatitaasunut sutigut aalajangersimasutigut qanoq kinguneqarsimaneranik misilittagaasimasut pillugit danskit naalagaaffianni pisortanut paasisassarsioqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut.

(Inuit Ataqtigiit Inatsisartuni ilaasortaataat)

Inuit Ataqtigiit Inatsisartuni ilaasortaataataasa matumani danskit ilinniarnermi siuariartornissaq pillugu aqqissuuseqqinnermut atatillugu kallaallit Danmarkimi ilinniagaqarnerniuteqarsinnaasunut qanoq sunniuteqarsinnaanera pillugu siunnersuut saqqummiussaat soqutigilluinnarlugu ATASSUT-mmi misissorsimavarput.

ATASSUT-mit pingaartittuaannarparput ilinniartut tapersersussallutigit atugarisai eqqarsaatigalugit, Kalaallit Nunaanniippata, Danmark-imiippata imaluunniit nunani allaniippataluunniit, taakuummatami siunissatsinnut isumalluutissatsit aningaasaliiffigisavut. Taamaattumik aamma ATASSUT-mit siunnersuuteqartut tunngaviummik isumaqatigivagut oqariartuutigimmassuk, pingaaruteqartoq danskit politikikkut qanoq isummernerisa arlaatigut kalaallinut Danmark-imi imaluunniit nunani allani ilinniartunut sunniuteqarsinnaaneri eqqumaniarfigissallutigit.

Taamaattorli aamma pingaaruteqarpoq isiginiassallutigit, kalaallit Danmark-imi ilinniariarusuttut suli annertunerusumik taamatut aaliangernerminut akisussaaffimmik tiguisarnissaat taamaasiornikkullu piareersarluarsimanissaq, nunamut allamut nuunnissamut piorsarsimassutsikkut, oqaatsitigut, eqqarsartaattitsigut aammalu avatagiisitigut Kalaallit Nunaanniit allaanerugaartumut, naak Naalagaaffeqatigiikkaluarluta.

Taamaattumik aamma ATASSUT-mit nuannaarutigaarput Naalakkersuisut akissuteqarnerminni erseqqissarmassuk iliuusissanik aallartisaasimanerit, tassuunakkut kalaallit Danmark-imi ilinniarusuttut suli annerusumik piareersimanerulernissaanik iliuusissat, tamakkuli oqaatigereerlugit ATASSUT-mit isumaqarpugut Danmark-imi ilinniarusuttut kisimi tamatumani isiginiarneqassanngitsut – tamattami ilisimavarput illoqarfigisaq qimallugu ilinniarnertuunngorniarfinnut imaluunniit ilinniarfinnut qaffasinnerusunut ilinniariartarneq immi inuusuttunut amerlasuunut assut unamminarsinnaasartoq – taamaattumik ATASSUT-mit isumaqarpugut tunngaviummik inuusuttut ilinniariartarfigisaanni imaluunniit qaffasinnerusumik ilinniarfinni ilitsersorneqarnerup aammalu siunnersorneqarnerup nukittorsartariaqarnera – Danmark-imi Kalaallit Illuini, kisianni aamma Kalaallit Nunaanni!

Taamatut ATASSUT-mit oqaaseqarluta, Naalakkersuisut siunnersuummut tapersiinerat taperserparput, qilanaarivagullu siunissami ilinniartitaanerup iluani iliuuserineqarumaartussat, taamaasilluta siunnersuutip saqqummiunneqartup akuersissutigineqarnissaa innersuussutigissavarput.

Qujanaq!